



**TE XANICH'
SOK TE K'ULUB**






MACH'A LA XCHOL TE A'YE: ABRAHAM SÁNTIZ GÓMEZ
MACH'A LA STS'IBAY TE A'YEJ: JUAN CARLOS GÓMEZ PÉREZ
MACH'A LA SPAS TE LOK'OMBAETIK: JUAN CARLOS GÓMEZ PÉREZ

TA NAMEY K'INAL, SPISIL TE CHANBALAMETIK TE KUXINEMIK TA BAJLUMILAL,
YA YAYBEY SBA TE SK'OPIK.




AY CHANBALAMETIK TE YA SMULANIK
A'TEL BIT'IL TE XANICH'ETIK.


YA ME JTSOB TE
JWE'ELTIK,
MELEL MA ME
XJALAJIX TE
K'IN JA'AL.




JICH TE XANICH'ETIK YA X-OCHIK TA A'TEL
K'ALAL K'EPELTOA TE K'INAL.



JA' NIX JICH AY CHANBALAMETIK TE LOM CH'AJIK BIT'IL TE K'ULUBETIK TE MA SMULANIK A'TEL, JA' NAX BAEM YO'TANIK TA PAS K'IN, YAKUBEL, SMOESEL SI'BAK, TIJ KITARA, TIJ K'AYOP, TIJ AMAY, SOK NIX AJK'OT. JUJUN K'AAL TE YAKUBEL, K'ALAL YA SPASIK TE K'IN, SPISIL YA XYAKUBIK, JAWAJTIKNAX YA XJILIK TA YUTIL SOK TA PAT PAT NAJ, JA' YIP TE POX. SOK NIX, JA' NAX YA YILIK TE BIT'IL TE XANICH'ETIK MA XKUXIK TA A'TEL.



ILAWIL TE XANICH'ETIK, MAYUK BIN ORA TE BUJTS'AN K'INAL YA YA'IYIK, TEMBILIKNAX TA A'TEL; JAK TE JO'OTIK BUJTS'ANAX YA XK'AX KU'UNTIK TE JUJUN K'AAL.




TE K'ULUBETIK BUJTS'ANAX YA YAIYIK TE A'YEJ, JA' YU'UN YA XKA STSE'LAYIK TE XANICH'ETIK.

ILAWIL TE BOL XANICH'ETIK, ILAWILIK, AY SWOKOLIK JAJAJAJAJA.



TE STSE'EJIK JA' YU'UN TE PAK'ATIKNAX TA CHIK' TA A'TEL TE XANICH'ETIK.

YAN TE XANICH'ETIK JA' YA XBAJT YO'TANIKA TE A'TEL.




SUJBAJTIK, NOP
ME XTALIX TE
JA'AL, IJK'NAX TA
ILEL TE
CH'ULCHAN.


JICH K'OY TA PASEL TE BIT'IL LA YAL TE XANICH'ETIK, TAL TE JA'AL, WEN K'IN JA'AL. TE XANICH'ETIK MA LA SMEL YO'TANIK, MELEL STSOBOJ TE SWE'ELIK, JICH LA SKOM SBAIK TA A'TEL, MELEL MA SPAS XLOK'IKIXA, SKA TE NOJ TE SBEJ JA'ETIK.



JA'NIX JICH TE K'ULUBETIK, MA STAK'IX SPASIKIX-A TE K'IN. TE JA'AL LA YICH' TAL BAYAL SIK, MA' JU' BIN LA SPASIKIX-A TE K'ULUBETIK, LAJ TE SWE'ELIK. JAJCHIK TA WOKOL, JAJCH SNOPIK BIN YA SPASIK, MELEL MA XU' YA XLOK'IK TA SLEJEL TE SWE'ELIK, MELEL TULAN TE JA'AL. LA YALIK:





YA XBA K'OPONTIK TE XANICH'ETIK, MELEL BAYAL LA STSOB SWE'ELIK, MA'YUK LA XKUXIK TA A'TEL STUKELIK, AY NIWAN XK'UXULIL YOT'ANIK, MELEL MA' LOTIL TE YAKOTIK LA LAJEL TA WI'NAL.



JICH TE MAMAL K'ULUBETIK BA SK'OPONIK TE XANICH'ETIK. K'ALAL K'OTIK TA STOJOL, LA XCHOLIK TE BINA SNAKIK.

MAMTIK XANICH'ETIK, TALME KILATKOTIK, SKA TE YAKONKOTIK TA LAJEL TA WI'NAL, TAL JOJK'OBHEYEXKOTIK TE ME MA XU' YA AK'EBEMBONKOTIK XUJT'UK TE AWE'ELIKE.



TE XANICH'ETIK LA XCH'AM YA'IYIK TE SK'OP TE K'ULUBETIK, PATIL LA SUTIK:




MELEL JMAMTIK XANICH'ETIK, JA' BAJT KO'TANKOTIK TA SPASEL TE K'IN, JELAW KU'UNKOTIK TE UCH' POX.



¿YU'UN BAL MA LA KILATKOTIK?, ¿YU'UN BAL MA LA ALABANONKOTIK TE WOL A'TEL YA JK'ANKOTIKE?





AWAY BIT'IL MA ME LEK TE YA JLABAN JBAJTIK, SOK NIX, TEME AY
MACH'A YA YALBAT A'TEJAN XCHI AK'OPLAL JA' ME XU' TE YA JTSAKTIK
TE LEKIL K'OP, MA ME LEK JICH YA JPASTIK BIT'IL LA PAS TE K'ULUBETIK
TE MA LA SNA' BIN LA YALIK, MELEL JA' BAJT YO'TANIK TE LABANWANEJ
SOK TE PAS K'IN.

